

寶雞縣志卷之十二

風俗

習尚

秦處仲秋之位男懦弱女高賒音中商其言舌舉而抑聲清而揚好稼穡務本業無鮮衣美食之矜而其弊好酒好博好訟殆管子所謂秦之民罔而好事者歟

邑屬雍州土厚水深其土子好高尚義其民厚重質直以善導之則易以興起而篤仁義以勇驅之亦足以動其強毅果敢之資平居畏官吏重犯法舊志謂有先王之遺風其信然歟

鄉俗好祀神社會演戲年不下數次雖春祈秋報農家故事然男

寶雞縣志

卷十二 風俗

一

女雜沓焚香拜禱賭博爭鬥動輿獄訟轉移之術正有賴於主

持風教者

時令

每年新春鄰里親族互相往來拜賀年節名飲春酒上元前數日鄉中爲讎或戲竹馬名鬧元宵端陽節各家以角黍雞卵會食兒童插艾葉榴花繫長命五絲繩七夕乞巧中秋宴客九賞菊此外每收穫後親友往來問莊稼豐嗇而已老子所謂其民淳淳者也

禮節

冠禮不行已久三加之儀俗無知者 婚禮議婚之初擇門第相

當媒妁通言兩家許允後以花紅綵線送女家名曰定親再擇吉納聘首飾衣物聘金不等是日女家製酒名曰行禮卽納采也將娶先月奉幣行請期禮娶之前一日以族婦或內戚婦擇其吉藹者往女家送上頭儀物謂之覲面俗不親迎只用花轎女家送親男家製酒親友送助儀者陪宴其拜堂合卺廟見略有古禮遺意至於無知齊民有養女接困之說財物儀文隨人增減矣 喪禮初歿帷堂次日殯殮七七哭奠士紳之家苦塊百日將葬先期刊刻墓志墓碑行述持送親友訃報葬期並請議葬先一日親友送奠儀此夕孝子行奠禮啟請師友知禮者相禮葬日晨興扶柩往墓所鼓樂導前預請尊貴者題主迎神

歸行虞禮三日孝子孝婦往墓祭奠謂之復山卽三虞禮也至於齊民稱家有無以爲隆殺儀節不甚相遠也 祭儀每歲元旦家家設木主於庭以祀祖先清明前數日各自祭祖父墳墓又合族同往先祖墳墓以祀名曰掃墓七月半冬至日亦有墓祭者總之於古今四時皆祭生忌日亦祭之禮有未合也 慶賀禮凡人家登科入庠入監壽期造屋親友族黨各具儀物屏幃之類祝賀主人晨午備酒席款待歡飲

物產

穀之屬黍稷白麥

周禮職方氏雍州其穀宜黍稷爾雅翼黍以大暑而種故謂之

黍省志關中所謂糜者本謂黍也 爾雅粢稷郭璞注今天下所謂粟米者正稷米也 本草拾遺小麥秋種夏熟出關中者爲上品縣冊邑產白麥以供貢

果之屬山梨榛實胡桃栗

詩秦風隰有樹檉毛傳檉赤羅也陸機疏云一名山梨今人謂之楊檉實如梨但小耳 鄭禮記注榛似梨而小唐書地理志鳳翔屬貢榛實宋史地志同 廣志陳倉胡桃薄皮多肌 詩秦風隰有栗 陸機疏栗五方皆有周秦特饒范子云栗出三輔

藥之屬天麻獨活羌活芎藭薇銜燈草升麻秦芫骨碎補

寶雞縣志

卷十一 風俗

三

名醫錄赤箭生陳倉川谷夢溪筆談云赤箭卽今之天麻苗也 金史地理志鳳翔路產獨活馬通志今寶雞扶風皆貢之 本草別錄薇銜一名無心草金史地理志無心草產鳳翔路 金史地理志羌活芎藭燈草升麻秦芫骨碎補皆鳳翔路產

草之屬蘭草蒹葭

詩秦風蒹葭蒼蒼毛傳葭蘆也 孔疏初生爲葭長大爲蘆成則爲葦 舊志例於二三月間益門四村入山採蘭送縣署知縣杜蕢生禁葦其事

木之屬桑楊楸楠柞櫟

詩秦風阪有桑隰有楊 又終南何有有條有梅毛傳條稻梅

楠 爾雅椶山椶郭注今之山楸也孫炎云荊州曰梅揚州曰楠 詩山有苞欒陸機云秦人謂柞欒爲欒河內人謂木蓼爲欒省志云俗呼花栗木

貨之屬漆席蠟

詩秦風阪有漆今邑南山產漆 唐書地理志鳳翔府貢龍鬚席蠟燭宋志同

禽之屬黃鳥雉鷗

詩秦風交交黃鳥毛傳搏黍也郭璞曰卽黃離留 石鼓詩麇鹿雉兔今邑處處有雉兔 詩鳩彼晨風毛傳晨風鷗也陸機疏似鷗青黃色向風搖翅

寶雞縣志

卷十一 風俗

四

獸之屬駁獨角獸毫猪

詩秦風隰有六駁毛傳駁如馬食虎豹 焦氏易林云三殺五羊迷入空谷徑涉六駁爲所傷賊 府志益門山中虎爲害一日風起有物張兩翼如赤旗其音如鼓片時風息樵者至見虎頭二虎爪八爾雅所謂駁如馬鋸牙山海經所謂音如鼓食虎豹是也 陳貞父宗雜錄寶雞有獨角獸樵者見其臥林間或搏虎而食之輒餘其半山家每得殘虎以飽清光緒時益門鎮賈家崖兩處有見之者 博物教科書毫猪身有棘毛長寸許粗如筆管中空外堅行有聲敵至則豎以免害今晁峪谷中偶見之

水族之屬鰻鯉鯊鱣鮒鯢鱣蛙

俱見石鼓詩中 舊志娑羅泉張三丰習靜處惡聞蛙聲禁之
至今產蛙不鳴

按此皆見諸經疏志記者此外穀如菽稻御米皆美種果如
桃李杏柿梨榴亦嘉蔬有生薑芋頭蘿蔔山藥芹韭葱蒜菘
苜蓿蕨之類藥有荆芥薄荷防風蒼朮柴胡瓜蒌葛根苦參
遠志棗仁貫仲茵陳山查五味瞿麥地榆木通首烏谷精之
品草則蘭艾蒲荻繁藻蒿茜各適人用木則松柏橡椴槐椿
榆柳均作材料禽獸有家有野最可惡者豺狼鱗蟲並育並
生至無用者蛇蝎惟貨屬雖無大宗而取資亦自不盡菸葉

寶雞縣志

卷十一 風俗

五

棉花爲川村之出產木板薪炭乃山家之利益藍靛有濟於
平原花生徧產於沙磧炭礦已現象於黑峪溝馬跡山等處
鐵鑛久馳名於孟家灘如再能講求發生爲利亦自無窮故
仿類書之例以志物產之繁而望人自濬利源也

鄧夢琴論曰國風始於周名二南終於豳與中間十有一篇
之秦風俱在今陝西所轄境內鄭箋云周召者禹貢雍州岐
山之陽地名屬右扶風美陽縣豳屬右扶風枸邑秦者隴西
谷名於禹貢近雍州鳥鼠之山今按周召俱在岐山縣枸邑
卽邠州之三水縣秦谷卽甘肅之秦州是也豳距邑遠不具
論秦非子牧馬汧渭之間秦文公獵於汧渭之間俱在縣東

境內舊志縣東三十里有周原卽岐周地而召亭距縣東界僅三十里則自畿內而被於諸侯吾邑承流最先所謂自北而南者應亦自東而西也集傳曰謂之風者以其被上之化以有言而其言又足以感人二南詩共二十五篇惡乎言言百穀草木耳言鳥獸蟲魚耳人於何感感於庶彙之蕃殖萬物之咸若而詠歌舞蹈於不自知耳然則物產之盈絀卽俗尚之美惡政治之得失所見端也是以當日者周公左召公右自關雎以至騶虞旣已被之管弦用之鄉人邦國然後本俗之安安息之養土宜之宅壘而措之裕如矣程子所謂有關雎麟趾之意然後行周官之法度是也至周易而爲秦而

風一變蒹葭白露之詩猶亟亟思復周禮豈非先王之教澤猶在人心與然蒹葭蒼蒼其氣已肅白露爲霜其陰始凝於此而欲復周禮以追二南之風亦祇溯洄溯游興懷於在水一方耳今覆讀其詩車鄰駟鐵卽牧馬蕃息之遺風寺人媚子卽近習壅蔽之嗃矢小戎無衣男女同仇終南北林盛衰相繼渭陽兆晉霸之先聲黃鳥知東征之不復至於夏屋渠渠則逐客之幾見矣猶是百穀草木鳥獸蟲魚耳世之相後曾幾何時而溫柔敦厚之風豐亨豫大之象何以一變而如風之所云乎然則政之所以行豈不由化之所以被乎國家深仁厚澤遠達海隅關中風俗敦龐被化最渥采風如右間

有百里不同之處抑亦儉嗇思深易導爲善至於嘉穀材木
不貴異物不致見異而遷尤所謂允迪保居者也年來大有
頻登民氣和樂惟在長民者休養生息庶幾存心愛物於人
必有所濟乎